

近代中國史料叢刊第九十七輯

沈雲龍 主編

舒藝室詩存

張文虎撰

文海出版社  
有限公司印行

齊	舍	日
克	出	出
笑	至	規
天	至	至
可	至	至
中	又	子
已	子	子

辛巳春三月仲的

阿蘭那館主沈銘元咸甫



舒菽室詩存序

雲間詩派振藻楚蘭馳情漢佩衣六銖而乘月機九張  
而織雲鼉采玢斑春華精絢胎息二俊膚浸六朝意搖  
體骨辭動魂識故步兵高逸小史致其流連黃門方雅  
豔婦形諸歌詠皆爲甄錄略可臚陳汎濫勝朝擗總  
昭代沿波討源含宮嚼徵夢召彩雀懷握靈蛇蔚乎挺  
此翹材鬱然成其文棟且夫詩之言持至張乎風化詩  
以見志涵泳其性情開金石感鬼神銘刻山川沐浴日  
月萬里而遙有如對面百世之下猶爲動心其思深其  
力緜恢恢有餘永永無極使惟締章繪句鍊月鍛旬已  
誇鼎之舉其龍文卽謂劔之衝乎牛斗近是非是其然

豈然雖世目之見推亦余心所不概及讀嘯山張君之  
詩瀏然以清戛然以長不探蔡邕之異書不學揚雄之  
奇字氣彌亘于宙合意牢籠乎區方勃念官邪抗誦春  
陵之作歛傷時變默存梁父之吟雖坐席三經陳書一  
篋而詼笑常聞嘯歌不廢則沖襟可挹躡步卽幾于千  
里雅詠所被攄辭自安于六義湔被舊俗導引新機非  
君而誰也方今泰運豐亨師行震懼黑山青犢之眾輒  
肆蠶屯黃巾白騎之羣敢逞螳拒君筆下成章詩出爲  
史弭盜可示諸掌擊賊非徒以口乃夙抱智略甘同隱  
淪康成旣謝生徒草菑書帶表聖不事官職管憑松枝  
鄉人依以爲居邑里藉之引重居有暇日學不曠功苟

勗精審音律樂詳推步三五然後知君實通才詩猶餘  
事也若僕者儒真一孔文非七依因出門而論交乃升  
堂而結分放意所好開心見誠造殷深源談會常至冷  
與沈休文坐時不覺移辱示篇章謬加評隲才優于天  
下湖海氣豪品絕於人中椒蘭馨逸言超言表而言立  
詩在詩外而詩成若夫鍾儀之操土風夏統之唱小海  
豈足爲君道哉咸豐丙辰仲夏吳江董兆熊夢蘭甫謹  
序

舒蓺室詩存一

南滙張文虎孟彪

善哉行

六龍挽車西沒東出長繩互天難繫白日解一方春向榮

桃李相依情隨事遷壯游日非解二甯飲濁河莫飲清濟

眾人皆醒而我獨醉解三三尺之桐中含五音七絃不調

孰知其心解四雄劍高飛雌劍挂壁仰天而歌聲裂金石

解五

卽事畱別

相逢纔把袂臨別又沾襟努力式明德敢忘嘉木陰滄  
波知己淚春草感恩心揮手竟無語南雲入壘深

雁

十里沙汀長綠蕪驚寒何處又銜蘆危枝漫效營巢鵲  
靜樹徒憐反哺烏遙夜呼羣殘月墮晴空顧影片雲孤  
高飛莫爲虛弦誤任取人間認乙鳧

病臥仿佛山房

夜靜百境宋荒村交犬鳴樹聲風作陣鐙影鼠窺檠浪  
跡枝駢拇孤蹤木寄生枕前多少地雙淚屢縱橫

雜感

日夜迴腸轉轆轤強將談笑代悲呼天涯兄弟飄蓬散  
海畔風霜弔影孤倉卒肯爲巢幕燕危疑猶似聽冰狐  
傷心不忍頻東望黯淡寒雲萬木枯

築塘行

蒸潮倒蹴金山根塘前齧齧增沙痕長官催呼役夫急  
萬指齊集如雲屯分班起號作邪許千槌雷動聲崩奔  
手胼足胝汗流血長官督責還相嗔爾曹里居悉瀕海  
扞築慎勿辭艱辛年年畚揭訖無補此過自要官民分  
下塘搏土上塘築雖有禁令誰能遵剜肉醫創暫收效  
一旦泛溢愁湮淪方今制府重籌海飭下各屬毋因循  
爾曹受賞宜努力上累官長非良民民拜稽首敢勿勤  
民官赤子官民親怠頑不僅累官長鞭撻亦自歸民身  
君不聞昔年俞太僕君不聞昔年尹相公築塘不惜殫  
心力屹然撐柱如崇墉三千八百五十丈潮頭雖獾無



由攻此邦戴德今百載父老稱說猶忡忡頻年海上多大風塘傾復築築復圯奉行故事難爲功烏乎君不見廟中龍神享血會低首無言待竣工

題黔滇苗圖

馬郎十六能擲刀頭插雞羽錦束腰蘆笙嗚嗚來跳月同年拍手還相招男女欣欣踴堂舞報草殷勤歲云算明廷干羽播遐荒安樂年年祭盤瓠

苗

長裾綵綬樓初下學唱喁于共心寫妾家父母重錢刀玉雪嬌兒換牛馬昨夜前溪銅鼓聲還將雞骨卜陰晴木棉花發紅如火青布纏頭陌上行

狝家

牂柯直下程番府八帥屯軍遂分土姹女齊矜細摺裙

丁男慣擊長腰鼓圍爐厝火一覺眠風吹翠袖不知寒

曉聞處處椎塘響姊杵晨炊妹鍤田

八番子

跋履持鏢獨來往南詔之東勁無兩古郡犍爲自漢封  
諸營莫笑降王長羅帕封頤金百環氈衫綵幅銀連錢  
郎鼓琵琶妾吹箎箎聲自應琵琶絃

楚

陽春三月花漫漫曠野人家戲鬼竿鬢鴉翻作狗耳髻  
釵鳳偏宜馬鎧冠長簪裊裊當雲髮一片霓裳白於雪  
莫恥貧家荆布妝明珠惹苳誰能別

龍家

打牙剪髮俗最奇平地架木如羊栖剝牛召眾做大鬼  
桶裙五色紛離披身披褚袍兩髻秃隊小隨行跣雙足  
谿崗雲深射黑驪山田日出驅黃犢

犵猪

金環約臂腰挾弩深目長身鬪如虎言語兇離狀宵停  
猙獰欲作天魔舞健兒本是水西羅跌脚吹笙自唱歌  
長刀斫地孰敢近掉尾斷頭祭爾何

獾獾

### 菊

金飈振百卉幽菊獨不驚擢秀寒圃內能使秋氣清顏  
色非不佳豈與凡豔爭採菊菊味苦君莫餐菊英

### 歲暮

燈盡還燒燭寒帷耿不眠風聲添夜雨客思入殘年愛  
靜翻成僻緣愁轉自憐寒潮與歸夢東注問誰先

公無渡河

戒友  
訟也

公有剽犀劍莫斬蛟與鯨公有拔山力莫與天吳爭河

波撼天天欲傾公胡爲兮臨流獨立而屏營屏翳扇風  
洪濤四起老狐聽冰載寔其尾盤渦轉轂千里一曲赤  
龍張須神螭睽目輕身試一擲爲餌苦不足身乎公無  
渡河公渡河掉頭長往如公何我將召河伯呼蓬婆駕  
白鼉乘靈鼉蹕勸公歸坎坎聽我笙篴歌

松溪舟次

垂柳綠粼粼往歲停舟處獨鳥隨人來悠然渡江去

潮聲

犬吠遙邨夢乍回空江夜靜片帆開透牖一綫朦朧月  
萬斛潮聲擁枕來

寄周堅伯

壩

客潮州

揮手凌雲賦遠遊海天飛夢落遐洲蠻山瘴嶺嵯峨甚  
萬樹桄榔是越陬

龍性從來未易馴相逢萍水忽相親黃荃畫本陽冰篆  
豪客多材數彥倫

澤國蒼茫足寄居幾回登眺自公餘自來越嶠推奇勝  
天馬橫雲定不如

金城石室儘幽尋嘯傲當風效越吟莫爲好奇頻命駕  
鳳溪東去鱣溪深

登高望遠一徘徊潮落珠江去復回親舍白雲行不遠  
何緣飛到嶺南來

幕府風流樂事多潮童進酒蠻娘歌離人自憶江南曲

不是魂銷爲越娥

潮陽自古番禺地  
蜃蛤魚鹽盡素封  
三百荔枝憑飽噉  
何須染指阿芙蓉

知交薺落悵年來  
矯首雲天羨霸才  
欲把歸期訂遊子  
客牕記取木棉開

題姚古然丈

前樞

孤篷聽雨圖

牢落江干短櫂橫  
濃雲壓岸暮潮平  
漁燈戍鼓參差裏  
屈指天涯第幾程

點滴疏篷攬睡遲  
江湖載酒欲何之  
故山迢遞難尋夢  
坐憶牀牀屋漏時

題紅林禽館詩草送古然丈之嶺南並寄堅伯

三年作客游於越濯足龍湫訪石梁雁蕩峰巔一拍手  
浩歌夢落仙人鄉天台桃花粲如錦戲劖石壁呼劉郎  
西浮巖江略贛水筍輿往往凌青蒼歸來津吏搜行裝  
先生笑指古錦囊刻畫奇觀出奇語山水精靈此中貯  
百丈寒潭不起波時有蛟龍作雲雨讀君詩筆轉激清  
知君作詩用意精卻媿窮年事章句苦吟浪學秋蟲聲  
雄才信得江山助仙骨難將學力爭比聞又將南渡海  
此別徑須更幾載蠻烟瘴雨感慨多搖筆淋漓倍光采  
海豐東去古瀛洲予有平生故人在寄語豪懷近若何  
壯遊陸賈志蹉跎粵王臺畔如延佇爲我題詩弔尉佗

贈別陳

大章

酌酒洗愁心心摧舌逾巧煮雪誑飢腸腸寒腹不飽誰  
使眼中人相看半枯槁憶昔聞汝名知汝能文藻江海  
有計生渤自謂與汝好誦汝冬聲詩出語驚奇矯何爲  
七尺軀及今尙潦倒邂逅一相逢頗恨聚日少男兒貴  
功名作達苦不早且復立斯須蓬門豈終老願爲孤飛  
鴻莫作投林鳥君行見計生爲我陳懷抱

敏航守風

艇子泊江隈蓬牖面面開亂帆分渡落悍水潑天來沙  
岸生春草烟村見晚梅爰居余亦暫鷗鷺莫相猜

寄懷趙星甫

紀勳

省親京口

得失豈無命孰云吾道非暴顛魚暫退蒼翮鶴終飛風



雨鳴寒劍星霜闕敝衣 聖恩偏浩蕩猶賜一羶歸  
歸心向吳會舉手別燕京驛路三千里崎嶇匹馬行關  
山羈旅客桑梓故園情話舊一尊酒相逢爲爾傾  
孰意君歸日余猶滯柘鄉逮予旋故里君又向朱方遊  
子顏如昔衰翁髯欲蒼五年違定省暫得侍高堂  
京口推形勝東南控上關無雙今國士第一古江山得  
句羣峰外相思落日閒投詩向揚子流寄鯉魚還

送孫汝璧歸魯山

君言男兒負此六尺軀風塵奔走徒區區我謂風塵奔  
走計亦得閉門家會真非夫願作神鷹擊攫九天上不  
願效寒鴟口拾腐鼠誇鸚鵡雛鸚鵡雛長苦飢寒鴟長苦飽

蹤跡向征途流年暗中老君才固非易君鬢良未斑我  
曹生世豈無用一第何必憂天慳送君歸車班班君家  
迺在汝州城南百里閒堯孫劉累昔居此至今父老呼  
堯山此山遙連魯陽關魯陽日莫戰酣處三雅之水流  
潺潺君不見龍可馴日可止壯士豪情有如此莫把雄  
心擲江水

憫農詞

少小任市廛不辨農與圃謁來居海隅農工始親覩寒  
耕復熱耘胼胝難悉數赤日灼肌膚四體嗟似剖方武切  
盡室事西疇尙恐爲榛莽莫補切況聞海塘圯桑田憂斥  
鹵城市多游閒側目笑村父一日飯三餐幾費耕作苦

入春多雨水霉雨尤瀰瀰一雨既匝月苦晴復繼之十日  
日趨趨風河水吹成泥高田生黃埃下田龜兆岐野老  
呼牛來爲我聊推移日午牛步蹇野老憐牛飢餒牛牛  
不會牛臥人亦疲人牛力俱盡豈忍加鞭箠仰天淚潛  
墮嗟怨安得辭

我歌憫農詞重爲農夫策晴雨固有時且復勤汝責黑  
豬昨渡河天意似可格詰旦陰雲生霖雨在茲夕炎風  
一以吹朝日仍赫赫四野聞農歌焦殺情孔迫儒生恣  
空談無補飢與溺誰能排九閻爲之請甘澤

錢武肅王龍簡歌爲錢澥薌椒作

明崇禎十七年吳中亢旱居民於太湖底掘得

銀簡重二十兩縱五寸奇衡三寸奇周刻一龍  
上雲下水文云大道弟子天下都元帥尙父守  
中書令吳越國王錢鏐年七十七歲二月十六  
日生自統制河山至臨吳越民安俗阜道泰時  
康市物平和遐邇清晏仰自蒼昊降祐大道垂  
恩今則特詣洞府名山徧投龍簡恭陳醮謝上  
荅元恩伏願合具告祈兼乞鏐壬申行年四時  
履歷壽齡遐遠眼光明家國興隆子孫繁盛  
志祈元貺允協投誠謹詣太湖水府金龍驛傳  
於吳越國蘇州府吳縣洞庭鄉東皋里太湖水  
府告文寶正三年歲在戊子三月丁未朔二十

六日壬申凡十行百七十有九字

國朝雍正閒吳江沈拙齋吏部嘗假搨數十本

翁徵君廣平得之以遺武康徐典簿熊飛徐以

轉贈武肅二十六世孫椒予按鄭坤洞庭記葉

弈苞金石錄補皆載有吳越投水金銀簡與此

互異嘉定錢少詹謂其時投簡非一次葉所見

本不言年號疑非武肅物此說固然然吳志伊

十國春秋注竟以葉見本定屬文穆則未有據

也續吳江縣志載此簡今下脫則字壬申行年

譌作庚申寶正三年譌作二年歲在譌作太歲

太湖備考亦承其誤豈均未覩此簡耶澥薌以

此簡裝潢成冊郵示索題因作長句寄之

商橫攝提歲孟冬叩關尺素來何從篁山山人好事者  
寄我古簡蟠雲龍硬黃瘦搨仿宋製押尾款識題重重  
百七十九字完好波磔秀拔神眷容錢王當日起草莽  
提三尺劍殲妖兇瓜分疆宇息征伐民無疹癘邊無烽  
投文告天歷洞府願國永享時熙雍上言大道弟子某  
列銜猶是朱梁封寶正三年在戊子爾時帝者唐明宗  
天成紀元不加吳越字恐失事大遭乘墉靈德王碑寶  
石制書例與此相于喁自戊迄辛越三載若合符節無  
疑武康豐山靈德王廟碑題寶正六年辛卯與此簡歲次  
合歐史載寶石山制稱寶正六年辛卯與此簡歲次何人紀事失徵攷誤以柔兆當闕逢余公綽闕王事

年策錢鏐爲尚父來年改寶正元年考同光元年係癸  
未來年乃甲申與金石所書年次不應通鑑考異糾之  
是方今嗜古得君輩恍住深谷聞登登惜哉荒倉不解  
事千年古物輕銷鎔問此簡今願君持此弄篋笥如寶  
白璧珍黃琮傳聞既渺史傳闕訪古猶得尋遺蹤殘宵  
披簡一再讀忽忽逸氣飛橫縱洞庭水府足金石誓當  
與君把臂胥母峰

### 衡山禹碑

衡山之高四千一十丈五方並峙遙對秦岱嵩華恆昔  
夏王禹帝命承曰汝不伐亦不矜作司空職惟汝勝下  
者陂高者陵隨山刊木四載乘岷山導江越南紀智營  
形折懷春冰血白馬以祭德動天鑿香始升乃夢元夸

使者乘飛軼金簡玉字祕綠滕禱黃帝巖禹乃登稽首  
頓首心兢兢檢以元都印書以南和繒壽之萬萬古刻  
石垂雲仍天吳帝江驚且歎暨巫支祈罔不懲元圭告  
成錫爾初天柱紫蓋何峻嶒七十二峰環相纏宇宙大  
文神所憑逾三千年見未曾昌黎韓退之好古勤擔簦  
祝融峰頭欲上不得上千搜萬索歎息愁撫膺何時螺  
書龍畫忽出世坐使仰屋著書之輩爭誇詭襲門觀中  
七十二字今已佚岳麓院本較多五字誰所增瑛楊  
慎諸譯見各別歷年久遠孰辨淄與澠或釋谷爲嗟或  
讀永爲蒸子雲希馮世無有蝌文鳥篆可想不可徵東  
柳陶生何處得一紙字跡完好無侵凌體勢如鳥翽飛



言有一  
翻或蟠結似騰蛇騰口欲蝕誦不敢滕筆欲仿象目遽  
嘗以手摸之疑有楞我聞昆明成都長沙西安紹興盡  
拓本當時真跡乃在岫巖之洞封以雲層層安能裹餓  
糧足躡翹與騰墨松滋紙刻藤方羊石壁閒仰臥曲兩  
肱天帝六丁毋我憎宣此苞符之祕開蒙顛攜歸以之  
詫十朋復恐下士大笑聲如蠅

元祐黨籍碑

元祐舊臣如贅疣一網打盡今無憂臣京載筆志諸石  
大書深刻垂千秋沒者追官奪封謚存者降斥窮荒投  
朝廷從此亂黑白毒逋四海天爲愁不三十年時事變  
陸沈痛哭嗟神州老豸竄逐死奚惜蒙塵之慘君何尤

否終則傾易所誠要當未雨先綢繆爾時哲宗固英主  
背憎嗜沓誰爲謀羣姦切齒睨政府退居詎肯忘私讎  
協恭補救方未暇一室底事操戈矛攻蘇發難自賈易  
孰意酷禍連同儔臣工專己主孤立目之以黨非無由  
燭火焚林漫莫辨搢紳何幸隨清流此碑列名三百九  
僉王附驥占包羞鳳皇之羣百身游此中那得容鴟鵂  
五都市物罔不收頑石豈許儕琳瑯布章惇楊畏李  
清臣慎勿喜公論自解分薰蕕

早起

曉聞好鳥鳴乃在嘉樹顛清露晨未晞山花夜初然性  
情得所契與物皆安便擁書北牖下綠草何芊緜眾籟

自喧寂我心渺無緣忽悟彭澤令固在羲皇前

張氏梅林訪十女殉節處

賸粉零脂委劫塵玉梅千樹表貞珉月明環佩歸來後  
仍爲癯仙作主人

靈芬何處薦疎麻樹古池平舊跡賒猶有存亾家國恨  
夜深彈淚與梅花

後築塘行

前年築塘海潮大十丈潮頭決塘過去年築塘多海風  
風沙捲地潮連空民財已竭工猶蕩督部陳情

聖恩廣白提粲粲黃紙封今歲修塘是官帑監司來太  
守來七邑聚議塘工開塘工開插旗打鼓船巍巍郡符

辨料如霆雷高飛精衛何爲哉西山木石空成堆  
秋燕渡海去曷不海外銜泥回內塘泥盡塘工促卻向  
灘前取泥築三百青銅五斗泥不耐潮魚一翻覆督工  
大令慘不肥肩輿僦從行如飛槌聲丁丁起塘下萬夫  
併力妃呼豨妃呼豨聲不住輿中大令顏色豫里胥乾  
沒役除頭日借塘工樂且釀昨夜迴瀾到半塘勢挾金  
山向西去君不見年年扞海海愈狂官司蹙額丁夫忙  
安得一勞永逸無彷徨恨天不生命海防明年八月秋  
潮漲更斂民捐募築塘

酬姚水北丈

兩

伯勞飛燕鳴春風五昔城邊逢髯翁切雲之冠佩長劍

虬須虎眉方兩瞳祝融燒天火繖紅朵雲墮地來郵筒  
一卷崑嶽亦何有品題乃比羅浮峰君不見羅浮峰峰  
峰矗立青芙蓉仙袞化作五色蝶滿身香霧游花叢讀  
君新詩知自道筆妙欲使天無功片辭莫贊幸勿訝長  
城敢以偏師攻嫩涼七月秋宇空停車草堂訪盧鴻浮  
梁酒熟勸我飲縱談八極開鴻濛丈夫通經貴致用何  
爲蹀躞蓬蒿中金馬承明夢不到寸莛莫扣豐山鐘才  
名嚇鬼鬼翻笑君從兄蘇卿文當題君詩稟云才名嚇鬼徒欺世詩句驚人欲問天坐使  
二豎乘詩窮別來五月書兩通停雲北望心忡忡千言  
脫手劍出匣彼病魔敢撓君鋒周柱史漢赤松安得四  
方上下長相從幅巾倘踐當時約待爾山前綠玉筇

岳忠武王名印歌爲王徵君之佐作

十二金牌三字獄風波亭畔冤魂哭滄桑瞥眼小朝廷  
那及忠臣一方玉玉高徑寸廣九分斑駁或作雲雷文  
女丁婦壬躋舌退劫火雖烈何由焚鞭筆伊誰妙鐫刻  
兩字昭然辨波磔隱約芝泥慘不鮮當時血濺萋宏碧  
湘水沈淪六百年著錄未入金陀編王郎展轉偶得此  
已去復返容非天吁嗟乎忠武功名滿人口一印存亾  
亦何有惟有淒涼慕古心歎息摩挲屢搔首君不見痛  
飲黃龍語豈誣姓名曾作辟兵符聞警早使烏珠遁膽  
落金兵不敢呼

由周莊至桐里

寺下

三

際曉東風急輕舸縱所如湖光浮遠碧帆影墮晴虛隔  
岸聞津鼓連村響水車望霖情正苦雲意故徐徐

過芙蓉湖

夕陽影裏片帆道無際烟波淡不收嵐氣晚含千樹潤  
水風涼蕩一湖秋尊前碧玉窺歌扇郭外青帘認酒樓  
料得九龍應齒冷逢山如此未句畱

丹陽道中

下流襟帶控朱方水遞悠悠驛吏忙百里郊原連秫稌  
六朝陵寢散牛羊長隄峻岼疑穿峽小隊騎輪半馱糧  
恰喜西南風解事片帆容易過雲陽

翠微亭

下山復上山，蹋葉陟高嶺。羣峰羅蒼茫，合沓亂光景。孤  
烟何處起，倏忽滿山頂。有時露雙鬢，華妝愈蔥靨。人投  
遠林樹，身沒寒空影。長江一衣帶，詎辨濤萬頃。金陵十  
萬戶，稊米不可省。坐收金粉地，盡入清涼境。思遙語已  
忘，目極情爲騁。引袖挹長風，白雲四山冷。

雨花臺

仄徑緣梅岡，巖椒望來久。螺旋凡幾折，力憊屢抖擻。山  
顛反平夷，其廣無半畝。荒臺存故址，斑剝苔錢厚。雲物  
媚千巒，烟霞挾兩肘。羣山如聽法，拱揖紛左右。想當誦  
經時，一一皆點頭。天風吹曼陀，續紛著林阜。豈知諸有  
相，彼相實無有。雨花花非花，不淨亦不垢。一勾乞南宗。



歸吟悟蒼帝

方正學祠

叔父非元聖皇輿誤太孫九原真可質十族竟何論鐵  
案存心史麻衣裹血痕景公祠不遠風雨泣忠魂

石城山

遠接鍾山勢巉巖氣鬱森伏龍曾至此駐馬一登臨建  
業降旛亂長江鐵鎖沈石頭頑未解虎踞到如今

登燕子磯

磴道捫蘿上疏鐘曉正撞風帆迴絕壁人語落空江樹  
密雲遲度濤洶石不降蟠龍王氣在南望翠崆峒

觀音山尋三台洞